

**ԺՈՂՈՎՐԴԱԿԱՆ ԶԲԻՍՏՈՆԵՈՒԹՅԱՆ ԴՐՄԵՎՈՐՈՒՄՆԵՐԸ
ԳՅՈՒՄՐԵՑԻՆԵՐԻ ՏՈՆԱԾԻՄԱԿԱՆ ՎԱՐՔՈՒՄ**

Ուխտագնացությունը ժողովրդական քրիստոնեության ձևերից մեկն է, որը լայն տարածում ուներ հայոց մեջ: Համաձայն Հայաստանյայց առաքելական սուրբ եկեղեցու՝ «Ուխտագնացությունը երկրից դեպի Աստված հոգևոր ճամփորդություն է՝ միջնորդավորված սրբավայրերով: Այն կապված է սրբացած տեղի գաղափարի և դեպի այդ սրբավայրը ձգտելու մարդկային քնական զգացման հետ: Ուխտագնացությունների միջոցով քրիստոնյան խորհրդական ու աղոթական հայեցողությամբ հաղորդվում է անցյալի սրբազան ժառանգությանը և դրանով իսկ կապ հաստատում ապագայի հետ, քանզի առանց անցյալի հետ կենդանի կապի անիմաստ է ապագայի հետ շփում ստեղծելու փորձը: Ուխտագնացությունը հայ մարդու անհատական կամ հավաքական կյանքի հոգևոր դաստիարակման լավագույն միջոցառումներից է, որը դեպի հոգևոր վերածնունդ տանող ճամապարհն է»:¹

Շիրակի և մասնավորապես Ալեքսանդրապոլ-Լենինական-Գյումրու հավատացյալ բնակչության ծխական կյանքի կարևոր ու ամրաժամ մասն էին կազմում ուխտագնացությունները: Նույնիսկ խորհրդային անաստված գաղափարախոսության պայմաններում շիրակցին ու գյումրեցին պահպանեցին իրենց անսասան հավատն առ Աստված: Եվ չնայած հալածանքներին, գյուղական քահանայական դասի ուղղակի ոչնչացմանը և եկեղեցիների փակմանը՝ նրանք շարունակում էին տարրեր տաղավար տոների ժամանակ կամ մատաղի համար այցելել նշանավոր ուխտատեղիները:

Ուխտատեղիները. Հայոց եկեղեցու ուղղադավան պաշտամունքի մեջ սուրբ վայրեր են Սրբերի գերեզմանները, հրաշագործ տաճարները, պատմական և կրոնական հիշարժան դեպքերի հետ կապ ունեցող տեղերը: Պատմական Շիրակը Հայոց աշխարհի այն գավառներից է, որտեղ, սկսած քրիստոնեության արշալույսից մինչև մեր օրերը, հիմնվել ու գործել են բազմաթիվ երևելի տաճարներ և ուխտավայրեր, որոնք իրենց նշանակությամբ դուրս են եկել գավառի տարածքից՝ ստանալով համահայկական, ազգային-եկեղեցական նշանակություն: Դրանց թվում հատկապես հայտնի էին և այսօր էլ նշանավոր են Հացիկ (մախկին՝ Թոփառլու) գյուղի սրբավայրը իր Ծակքարով, Սառնաղբյուր գյուղն իր սրբավայրերով ու բուժիչ ջրով², ինչպես նաև Գյումրու Սր Աստվածածին կամ Յոթվերջ եկեղեցին՝ Մարիդամիչի «Յոթ վերջ» սրբապատեղիերով: Դրանց նկատմամբ ժողովրդի վերաբերմունքի մասին ժամանակակիցները նշում են. «Աստվածածնի մատաղ շատ էին անում թե՛ գյումրեցիները և թե՛ շրջակա գյուղերից, Ախալքալակից եկող ուխտավորները: Վարդևորին շրջակա գյուղերից, հատկապես Ախալքալակից և նրա շրջաններից գալիս էին Գյումրի, Աստվածածին ուխտի, Գյումրուց էլ գնում էին Ղաթախյի՝ սուրբ Օհաննես, Թոփառլի գյուղի մոտ»:³

Շիրակում պաշտելի և հարգի սրբավայրերի շարքում իրենց ուրույն տեղն ունեն Թոփսմանուկները, որոնք ընդունված է համարել տեղական նշանակության ուխտատեղիներ: Հետաքրքիր է, որ պատմագավառի Թոփսմանուկներն ունեն ոչ միայն

¹ Հայաստանյայց առաքելական սուրբ եկեղեցի, Քրիստոնեական, Վանաձոր, 2001, էջ 102:

² Սառնաղբյուրի քարանձավը, որի ընդերքից քիչում է բուժիչ ջրերը, համաձայն ժողովրդական պատկերացումների, կապվում է Սր Գրիգոր Լուսավորչի անվան հետ:

³ Գյուլեցյան Հ., Գյումրի (Ալեքսանդրապոլ, Լենինական), ՀՀ ԳԱԱ ՀԱԻ ազգագրության բաժնի արխիվ, տետր 2, 1980, էջ 155:

տեղական ծագում, այլև, այսպես ասած, «բերովի» են, այսինքն՝ 1830-ական թթ. ներգաղթած արևմտահայերն իրենց հետ բերել էին իրենց պատմական հայրենիքի այս կամ այն Թուխմանուկի մասին որոշակի հուշեր կամ էլ կոնկրետ սրբագործված առարկաներ ու Թուխմանուկ կոչվող Ավետարաններ: Ալ. Մխիթարյանցը հիշատակում է մման դեպքերի մասին. «Օսկե կող ու կարմիր Ավետարանները տերտերներուն էրագ կուգան թե՛ մեզի մեր տեղը-մեր օթևանը տարեք, թե չէ աչքերդ կը համենք»: Կամ՝ «...սատանա Սարգսենց Թուխմանուկը ջահել տղի պես է ու ամեն օր կերթա Բասեն, իրան օթևանը հանդիպի կուգա»:⁴

Շիրակում առկա բազմաթիվ հնագույն հետքեր ունեցող սրբատեղիներ իրենց տեսքով, դիրքով և ժողովրդական ուխտագնացության մինչ օրս պահպանված եղանակներով հար և մման են հայագիտության մեջ հանդիպող Թուխմանուկների նկարագրությանը:⁵ Դրանք Հոռոմի, Լեռնակերտի, Աղինի, Գյումրու, Արթիկի, Լուսադրյուրի, Ջրառատի, Մեծ Սեպասարի և այլ վայրերի սրբավայրերն են:

Շիրակցիների համար ոչ պակաս կարևոր ուխտատեղիներ էին մակ Տան սրբերը, որոնցում հիմնականում պահպանվում էին ձեռագիր Ավետարաններ: Սրանց շարքում հատկապես կարելի է առանձնացնել «Ղալիջվա Ավետարանը» (ներկայիս՝ Վահրամաբերդ), «Դեաղվա Ավետարանը» (ներկայիս՝ Գետք), Բաջողվա (Հայկավան) «Բայո մամի» ու «Դլիջ» Ավետարանները, «Աղինի կարմիր Ավետարանը», ինչպես մակ Ախալցխայի Ծուղբուտ գյուղի հռչակավոր մագաղաթյա Ավետարանը, որին ուխտի էին գնում Կարինից Ալեքսանդրապոլ գաղթած վերաբնակները:⁶ Տան սրբերին այցի էին գնում հիմնականում երագով և հիվանդների ապաքինման ակնկալիքով:

Բացի տեղական սրբավայրերից, ուխտի էին գնում մակ Հայաստանի այլ նշանավոր վանքեր ու եկեղեցիներ, ի մասնավորի՝ Մշո Սր Կարապետ (մինչև XXդ. սկիզբ), Սր Էջմիածին, Կոշի Սր Գևորգ, Ծաղկեվանք, Թալինի Կարմրավոր և այլքն: Հատուկ ուխտագնացություն էր իրականացվում Սուրբ երկիր՝ Երուսաղեմ, Բեթղեհեմ և Հիսուս Զրիստոսի երկրային կյանքի հետ կապված այլ վայրեր:

Ուխտավորները. Ըստ Հայաստանյայց առաքելական սուրբ եկեղեցու՝ «Ուխտավորը հավատքով և իմաստությամբ առեցում այն անձն է, որը քաջ գիտակցում է իր մեղանշականությունը և պահանջ է զգում Աստծու և սրբությունների հետ հաղորդակցվելու ոչ միայն հագեցնել իր հոգեկան ծարավը, իմաստավորել իր կյանքը, այլև զորություն ստանալ Սուրբ վայրով՝ դիմակայելու գալիք փորձություններին»:⁷ Սա նշանակում է, որ ուխտ անել ու գնալ կարող էին բոլորը, անկախ սեռից ու տարիքից:

Մեր կողմից հավաքած դաշտային ազգագրական նյութերի⁸ ու ձեռագիր աղբյուրներում առկա տեղեկությունների հիման վրա ուխտագնացությունները՝ որպես ժողովրդական քրիստոնեության դրսևորման ֆենոմեն, կարելի է դասակարգել *ա) ամհատական, բ) ընտանեկան և գ) ազգակցական-դրացիական մեծ խմբերով տեսակների:*

⁴ Մխիթարեանց Աղ., Փշրանք Շիրակի ամրարներից, Էմինյան ազգագրական ժողովածու, հ. 1, Մոսկովա-Ալեքսանդրապոլ 1901, էջ 162-165:

⁵ Թուխմանուկների մասին ավելի մանրամասն տե՛ս «Թուխ մանուկ» նստաշրջանի նյութեր, Եր., 2001: Մարտյան Հ., «Տան սուրբ» երևույթը. Աղունքների հարցը և մերօրյա դրսևորումները, Հայոց սրբերն ու սրբավայրերը, ակունքները, տիպերը, պաշտամունքը, Եր., 2001, էջ 337-346:

⁶ Բազեյան Կ., Դաշտային ազգագրական նյութեր (հետախույ՝ ԴԱԼ), Ախալցխա, Լենինական, 1986:

⁷ Հայաստանյայց առաքելական սուրբ եկեղեցի, Զրիստոնեական, էջ 102:

⁸ Օգտագործվել են 2011թ-ին Շիրակի մարզի Ոսկեհասկ, Հացիկ, Այգարաց և Ագատան գյուղերում հեղինակների հավաքած դաշտային նյութերը և Գյումրիում անցկացված սոցիալաբանության արդյունքները:

Անհատական ուխտագնացությունը տարածված էր XIX-րդ և XX դարասկզբին, այսինքն՝ մինչխորհրդային շրջանում: Անհատական ուխտի գնում էին գերազանցապես տղամարդիկ և բացառապես Մշո Սր Կարապետ վանքը կամ Սուրբ երկիր (Երուսաղեմ): Ըստ ժողովրդական պատկերացման, «Սուրբ Կարապետ մեծ մասամբ գնում էին ունևորները, որովհետև գնալ-գալը, որ տևում էր մի քանի օր, և՛ ժամանակի (գործից կտրվելը), և՛ դրամի հետ էր կապված: Սուրբ Կարապետի ուխտ մեծ մասամբ գնում էին երիտասարդները: Կնոջ կամ աղջկա գնալն արգելված էր, որովհետև կին է գլխատել տվել Հովհաննես Սկրտչին և գլուխը սկտառելի մեջ դրած պարել: Սուրբ Կարապետ ուխտ գնալը մեծ իրադարձություն էր գյումրեցիների համար: Ամեն մայր մեծ երջանկությամբ էր համարում այդ ուխտագնացությունը և երանի (երևակ) էր տալիս այն օրվան, երբ իր տղան (կամ տղաները) կարժանանա այդ փառքին»:⁹

Ընտանեկան ուխտագնացությանը մասնակցում էին կա՛մ ամուսիններով, կա՛մ ամուսինները զավակների հետ: Գյումրեցիների ավանդական կենցաղում ընտանեկան ուխտագնացությունները կապված էին տվյալ ընտանիքի կոնկրետ ուխտի հետ՝ անգավակություն, փափագելի տղա երեխայի ծնունդ, երեխայի պաշտպանություն, հիվանդությունից ազատում և այլն: Հատկանշական է, որ ուխտագնացության ընտանեկան ձևը պակասեց խորհրդային տարիներին ու նորից լայն տարածում ստացավ հետխորհրդային շրջանում:

Առավել ընդունված էին ազգակցական-դրացիական խմբերով հանդիսավոր ուխտագնացությունները, որոնք խիստ մարդաշատ էին, տոնական և ընդգծված հասարակական բնույթ էին կրում: Ուխտագնացության այս ձևը, որ լայնորեն տարածված էին XIX-XX դարերում, մեր օրերում հազվադեպ է կատարվում, ինչը բացատրվում է նյութական տուր պայմաններով: Սովորաբար մեծ խմբերով ուխտագնացության ժամանակ մատաղ էին անում, հացկերույթ կազմակերպում. դա բավականին ծախս է պահանջում, ուստի հասու չէ այսօրվա շիրակցիների և գյումրեցիների մեծ մասի համար:

Ուխտագնացության ժամանակն ու նպատակները. Չմայած այն բանին, որ ուխտ անելու ու սրբավայր գնալու վերաբերյալ հայոց եկեղեցին կոնկրետ օրեր չի սահմանել, ժողովուրդն ուներ իր հաստատագրված ու անխախտ կատարվող ուխտագնացության օրերն ու հատկապես տոները: Ինչպես վկայում են ձեռագիր աղբյուրները, ավանդաբար (XIX-րդ), տարվա մեջ նշանավոր օրեր էին ուխտագնացության օրերը: Էջմիածնի ուխտագնացությունը կատարվում էր Վարագա խաչին, բայց այնքան էլ հանդիսավոր չէր: Գրավիչ էր միայն գնացող ընտանիքների համար: Երուսաղեմ էլ ուխտավորներ էին գնում: Նրանք գնում էին այն հաշվով, որ Ջատկի կիրակին այնտեղ գտնվեն, «դուս գերեզմանին» արժանանալու, գլխադրի, գերեզմանը համբուրելու, հաջիմդուսի դառնալու: Սրանց ուխտագնացությունը տևում էր վեց ամիս: Լենինականցիք (իմա՝ ակեքսանդրապոլցիները, Կ.Բ.) ուխտ էին գնում Մշո Սր Կարապետ և Էջմիածին: Այն բարի ժամանակներում, 60-70-ական թթ. (նկատի ունի 1860-70-ական թթ.-երը, Կ.Բ.) երբ հայերի ու բուլղարների մեջ բշտամություն չկար, դեպի Տանկաստան երթևեկությունն ազատ էր, քե՛ առևտրի, քե՛ ուխտագնացության համար: Ռուսահայերը շատ էին սիրում Մշո տուրքան սուրբ Կարապետին, քյանդղբազների մուրազատվին: Հաշտարխանից, Դզարից, Մոզրոկից, Նոր Նախիջևանից մեծ ընտանիքներով գալիս էին Լենինական, վոր լենինականցիների հետ միասին սահմանն անցնեն, գնան ս. Կարապետ:¹⁰ Ալեքսպոլցի հայտնի մտավորականներից մեկի՝ Նիկողոս Նիկողոսյանի վկայությամբ՝ «Նշանավորն այն էր, որ ժողովրդի աչքում Երուսաղեմ գնացող հաջինե-

⁹ Գյուլեջյան Հ., Գյումրի, տեսք 2, էջ 151-153:

¹⁰ Նիկողոսյան Ն., Լենինական, ՀՀ ԳԱԱ ՀԱԻ քանահյուսության արխիվ, FF II, էջ 7269:

ըը լավ համարում չունեին, նրանց մասին ասում էին, որ խղճերն այնտեղ են թողել, հավատներն ուրացել»:¹¹ Ալեքսանդրի մեկ այլ ակամատես-հուշագրի վկայությամբ՝ «Գնում էին ոչ այնքան բարեպաշտությունից, որքան սնապարծությունից և նոր վայրեր տեսնելու հետաքրքրասիրությունից»:¹² Հաճախ ուխտի գնացած ընտանիքների տոնամուտը կամ զբաղմունքն ու արհեստը ցույց տվող ազգանունները փոխվել են և դարձել Մահ-տեսյան կամ Մուղղուսյան (*մահտեսի, մուղղուսի, հաջի* եզրերը միևնույն նշանակությունն ունեն և Սուրբ երկիր գնացած ուխտավորների պատվանուններ են համարվել):

«Համբարձումից 40 օր հետո մինչև Վարթևադ (Վարդավառ) սկսվում է Սուրբ Կարապետի պատը, որը պահում են մեծ մասամբ պատավ կանայք, ջահել աղջիկները, որոնք մուրազ ունեն, և այն տղամարդիկ, որոնք Սուրբ Կարապետ ուխտ են գնալու: Այս պատը պարտադիր չէ մյուս պատերի նման, բացի վերջին շաբաթվանից: Սուրբ Կարապետի պատը պահում էին չոր՝ մինչև Վարդավառ պատը չէին ուտում, և թաց՝ շաբաթ և կիրակի օրերը պասն ուտում էին: Սուրբ Կարապետի պատը պահում էին մեկից մինչև յոթ տարի, մայած պահողի խոստմամբ: Ժողովրդի մեջ հռչակված, հրաշագործ, մուրազատու սուրբ էր համարվում սուրբ Կարապետը: Այն ժամանակի լարախաղացներն իրենց ճարպկությունը վերագրում էին Մշո Սուրբ Կարապետի տված շնորհին: Երբ երդվում էին «սուրբ Կարապետ», ապա ճշմարտությունը կասկածելի չէր»:¹³ Սուրբը երածիշտների, լարախաղացների ու թատերական ներկայացումների հետ կապված անձանց հովանավոր պատրոն-փիլոն էր, և նրա անվամբ երդվելը ինքնին մեծ պատասխանատվություն էր, իսկ երդմնազանցությունը հավասար էր հոգևոր «մահվան»:

Մշո սուրբ Կարապետի՝ որպես համահայկական սրբատեղիի մասին ավելի մանրամասն պատմում է Ալ. Մխիթարյանը. «Սուրբ Կարապետ. այս տոնը, ըստ օրացույցի, անխափան կատարվում է հունվարի 15-ին, բայց այստեղ դնելն իր առանձին պատճառն ունի: Համբարձմանից մինչև Վարդավառ, ամբողջ եօթ շաբաթ, շատերն առանց լուծելու ինչպես մեծ պատը (ոմանք էլ շաբաթ կիրակի լուծում են) Սուրբ Կարապետի՝ կամ «Օխտն անուան» պաս են պահում եօթ տարի շաբաթական և անընդհատ: Եօթ տարին լրացնելուց յետոյ, գնում են Մշո կամ Տաթևոյ Գլակայ կամ Իմնակնան վանքը «Մշո սուրբան»-Յովհաննու Սկրտչի «մարմառ գերեզմանին» ուխտ ու երկրպագությւն, որ մուրազները տայ և սրտերի խորհուրդներն ու խնդրածքները կատարէ: Շատերը նպատակ են դնում գերեզմանի վերայ խնդրել, որ իրանց «Օխտ գոմշի ոյժ տայ», ոմանք լարախաղացությւն են խնդրում, ոմանք սազ ածել ու բանաստեղծական տաղանդ, ոմանք իրանց ցաւերին փարատութիւն, ոմանք էլ այլ և այլ շնորհքներ: Իսկ անգա՛վակ ծնողները, գօտիները դնում են գերեզմանաքարի վերայ, ջերմեռանդ աղոթում ու անծանոթ մէկին հրաւիրում, որ գօտին մէջքը կապէ, այն նպատակով, որ զաւակ ծնանելիս՝ քաւորը մա լինի: Այդ ճանապարհով զաւակ ստացողները և միամօր զաւակատէրերը, զաւակները ծնած օրից ուխտում են իրանց զաւակների գլխի մագերը այնքան ժամանակ չը խուզել, մինչև որ նրանք գնան Ս. Կարապետի գերեզմանին ուխտ անեն, ապա այնտեղ գերեզմանի վերայ վեր են անել տալիս, այդ մագերից բարակ պարան են ոլորում ու կապում այն անելի վերայ, որով անելում են վանքն ու գերեզմանի շուրջը սրբում-խոտակում: Շատերն էլ խնդրում են, որ իրանց զաւակներին խելք ու շնորհք տայ, որպէսզի իրանց մահուանից յետոյ՝ օճաղները ծխացնեն ու վառ պահեն»:¹⁴ Հատկանշական է նաև, որ շիրակցի մայրերը հիվանդ կամ անհանգիստ երեխաներին (միայն տղաների մասին է խոսքը) քնեցնելիս կամ հանգստացնելիս օրորո-

¹¹ Նիկողոսյան Ն., *Լեռնական, ՀՀ ԳԱԱ ՀԱԻ քանահայտության արխիվ, FF II, էջ 7269-7270:*

¹² Գրիգորյան Հ., *Գյուղի, տետր 2:*

¹³ Նույնը:

¹⁴ Մխիթարեանց Աղ., էջ 272:

ցային երգի բանաձևում հիշատակում էին այս հռչակավոր սրբի անունը և զորությունն էին թախանձում նրանից. «Մշո սուրբան սուրբ Կարապետ, պահապան իմ բալիս»:¹⁵

Ծառադարձարին (Ծաղկազարդ) և հատկապես Համբարձմանը շիրակցիները ուխտի էին գնում Արայի լեռան ստորոտին գտնվող Ծաղկեվանք ու մասնակցում ժողովրդական տոնախմբություններին:¹⁶

Ինչպես վերը նշվեց, Սր Աստվածածնի տոնին այլ տարածաշրջաններից գալիս էին Գյումրի, իսկ գյումրեցիները գնում էին Ղաթախչի (Սպիտակի մախկին վարչական շրջան, Հաթթագյուղի մոտ)՝ «Սուրբ Ովհանես» (Սր Հովհաննես) վանք: Ուխտավորների հոսքը դեպի բավական բարձր և դժվարամատչելի լեռնագագաթի վրա կառուցված մատուռ սկսվում էր առավոտ ծեփին, իսկ ցերեկը կատարվում էր մատուռի արարողությունը և խորհրդային տարիներին նաև խնջույքը: Սր Հովհաննես գալիս էին մուրազով, այստեղ էին բերում տարբեր հիվանդություններ, հատկապես ընկճավորություն ունեցող երեխաներին, որոնց ծնողները շարակած բարձրացնում էին «զորավոր սրբի օթևանը»: Մեր հավաքված դաշտային ազգագրական նյութերում հանդիպում ենք վերը նշված հիվանդությամբ տառապող երեխաներին Սր Հովհաննես ուխտի տանելու բազմաթիվ դեպքեր: Օրինակ. Պարզևուհի Բարբաբյանն իր որդուն՝ Սարգսին, որը մանկուց տառապում էր ընկճավորությամբ (հարկանները Զյադո Սաքո էին կոչում նրան) յոթ տարի շարունակ շարակած ու ռտաբորիկ Լեհինականից տարել է Ղաթախչի Սր Հովհաննես՝ իր հետ տանելով նաև նվերներ այնտեղ գուշակություններ անող քյադակներին: Բանասաց Ազնիվ Բարբաբյանի խոսքերով՝ իր նղբայրը բուժվել է, իսկ ինքը երազ է տեսել և իր բնակարանի մի անկյունում Սր Հովհաննեսին նվիրված «օթևան» է պատրաստել, որտեղ գալիս էին մոտ վառելու դրկիցները:¹⁷ Ղաթախչի Սր Հովհաննես՝ բերում էին նաև յոթ տարի մուրազով ծամերը չկտրած տղա երեխաներին, որոնց ծամկտրության ծեսը կատարվում էր հենց մատուռի դռանը:¹⁸

Շիրակցիները հոգեկան ծանր խանգարումներով տառապողներին («կապի խելառներին») հիմնականում ուխտ էին տանում Կոշի Սր Գևորգ եկեղեցի և հավատում էին, որ վիշապասպան այս սուրբը իր նիզակով կխոցի հիվանդի ներսում բույն դրած դևերին ու չարքերին՝ ազատելով նրան հոգեկան և մարմնական տառապանքներից:¹⁹

Ուխտագնացության նկարագիրը. Ուխտագնացության ձևերն ու նդանակները տարբեր էին՝ պայմանավորված դրա ամենատական, ընտանեկան կամ համայնական բնույթով: Ամենատական ու ընտանեկան ուխտագնացությունը, կապված լինելով մասնավոր նպատակով արված ուխտի ու կոնկրետ սրբավայրի հետ, պահանջում էր խիստ կանոններ (գնալ ռտաբորիկ, լուռ, առանց հետ մայելու և այլն), որոնց պահպանումը պարտադիր էր ուխտն ընդունելի լինելու առումով: Ազգակցական-դարցիական մեծ խմբերով ուխտագնացությունը, մինչդեռ, կապված լինելով ժողովրդական տարեցույցային տոների հետ, ուրախ ու զվարթ բնույթ ուներ և ուղեկցվում էր զվարճանքներով՝ երգ ու պարով, խաղերով, հացկերությամբ: Ահա ինչպես է նկարագրում Ն.Նիկողոսյանը XIX դարավերջին Մշո Սուրբ Կարապետ կատարվող ուխտագնացությունը. «Վարդավառից երկու շաբաթ առաջ ուխտավորներն իրենց ազգականների հետ հավաքվում էին Արփաչայի ափը: Հավաքվում էին նաև շատ հանդիսատեսներ: Առավոտը վաղ գետի ափին վրաններ էին խփում և սկսում էին քեֆ, ուրախություն: Ամեն կողմից

¹⁵ ԴԱՆ, Լեհինական, 1986:

¹⁶ Օգարաբյան Ա., Հայոց ժողովրդական հավատալիքները, Պատմական գիտությունների լիակրթի գիտական աստիճանի հայցման ատենախոսության սեղմագիր, Եր., 1995, էջ 17:

¹⁷ Աղանյան Գ., ԴԱՆ, Լեհինական, 1986:

¹⁸ Նույնը:

¹⁹ Նույնը:

լսվում էր գոտնի ու դեղի գլի ձայնը, սագանդարների քաղցր նվագը, երգ, պար, բացականչություններ խառնվում էին իրար: Այդ ամենը մի առանձին հրապույր էր ներկայացնում, և մարդիկ ցանկանում էին ինչ էլ վոր լինի, իրանք էլ մի օր ուխտ են գնալու:

Կես օր լինելուն պես ուխտավորների առաջնորդները դավազները կարգադրում էին ձիերը նստել: Իրանք կարմիր դռնակները քերին գցած անցնում էին գետը, հետները տանելով ուխտավորներին: Օղը բնդում էր «մնաք բարով – գնաք բարով» ասողների ձայնից: Ուխտավորների մեջ լինում էին հետևակներ, որոնք տանում էին հետներն իրենց 7-8 տարեկան աքու զավակներին: Նրանք երեխայի ծնվելուց առաջ խոստացել էին ոտքով ուխտ տանել անդրանիկ զավակին: Երեխայի մագերը չէին կտրում, հյուսում էին, վոր գերեզմանի վրա խուզեն, տղան մնացական լինի»: ²⁰

Նշված տոների ժամանակ սրբավայրերում այնքան մեծ թվով ուխտավորներ էին հավաքվում, որ մարդկանց բազմությունը տարածվում էր սրբավայրի բոլոր չորս կողմերում: Ուխտագնացության մասնակիցները, իրենց ցանկությունները, նպատակներն ի կատար ածելու միտումով, թաշկինակներ կամ հագուստի կտորներ էին կապում մոտակա սրբազան ծառերից, լվացվում տեղի բուժիչ աղբյուրի ջրով, դիմում գուշակների օգնությանը: Նրանց մասին հետաքրքիր տեղեկություն է հիշատակում Հ. Գյուլեյյանը. «Նախախշում լինում էին նաև քյադակներ (երևի հեթանոսական ժամանակներից մնացած ծիսակատարության մնացորդներ): Քյադակները (մեծ մասամբ կանայք) իրենց դիմող այցելուի համար գուշակում էին ապագան: Քյադակներն իրենց համարում էին սրբի դուլը (ծառան) և իբր սրբի թելադրանքն էին բարձրաձայն հաղորդում իրենց դիմողին: Իհարկե, առանց խաչհամբուրի (վարձի) ոչ ոք չէր դիմում քյադակին: Քյադակը գուշակում էր ուշագնաց վիճակում: Ժողովուրդը հավատում էր նրանց, ամեն կերպ սիրաշահում էր, որպեսզի նրանց աղեն՝ սուրբը չբարկանա և չպատժի»: ²¹

Քրիստոնյա շատ ժողովուրդներ ի ծնե խելագարներին, մարմնական որոշակի այլանդակություններով «աչքի ընկնողներին», որոնք ապրում էին նշանավոր սրբավայրերի և վանքերի հարակից տարածքներում, համարում էին «Աստծո մարդիկ» (Այս առումով հետաքրքիր է շիրակյան հետևյալ բանաձևը. «Քյադակ՝ Աստծու գյադակ»): Համաձայն ժողովրդական պատկերացումների՝ Աստծո խելագարների և այլանդակների գուշակությունները ճշմարիտ են, քանի որ նրանք, ծնվելով աղյախին, աստվածային շնորհների են արժանացել ու իրենց հոգում և մարմնում կրում են մնացյալ մարդկանց մեղքերը: Օրինակ՝ ռուսական միջավայրում այս խելագարների և այլանդակների ինստիտուտը բավական լայն տարածում ուներ և հայտնի էր «յուբոդիվին» (юродивые) անվամբ: Ուղղադավան բոլոր եկեղեցիները, չընդունելով հանդերձ գուշակությունները և համարելով դրանք սնտոի հավատալիքներ, միևնույն ժամանակ բավական լոյալ վեդաբերմունք են դրսևորում «Աստծո խելագարների» և այլանդակների նկատմամբ և ճանաչում են նրանց որպես «խոնարհությամբ հանուն Քրիստոսի այլանդակ պատկեր ընդունածների»: ²²

Նկարագրելով ուխտագնացության կարևոր բաղադրիչներից մեկը հանդիսացող մատաղի արարողությունը՝ Հ. Գյուլեյյանը գրում է. «Եկեղեցու երկու բակում էլ մայրում էին ոչխարները և գառները, որոնց բերել էին օշնած (օրհնած) աղ տալու: Մատաղացուներին երեք անգամ պատեցնում էին եկեղեցու շուրջը, որ մատաղը համով և ընդունելի լինի: Ուխտավորները եկեղեցու բակում մորթում էին գառը կամ ոչխարը, գլուխը, ոտներն ու մորթին տալիս էին ժամկոչին, հենց եկեղեցու բակում մատաղը եփում, բաժանում աղքատներին և մատաղ ուզողներին և ապա վերջում էլ իրենք ուտում:

²⁰ Նիկողոսյան Ն., նշվ. աշխ., էջ 7270:

²¹ Գյուլեյյան Հ., նշվ. աշխ., էջ 155-156:

²² Дяль Вл., Толковый словарь живаго великорускаго языка, т. IV, С-Пб., 1882, с.669.

Գյումրեցիներն մեծ ջերմեռանդությամբ էր մտածում մատաղին: Ըստ նրա՝ մատաղը մեղքերին բողոքում էր տալիս, հաջողության և ստողջության գրավական է և աղ պատճառով եթե իրենք մատաղ չէին արել, բոլորովին անհարմար չէին համարում ուրիշից մատաղ ուզելը»:²³

«Վերադարձին քերում էին նվերներ՝ թաշկինակ, գլխաշոր, մանր-մունր զարդարանքներ և գազային (մամանա), որ նստում էր ծառերի տերևներին, կանաչ, քաղցրահամ ու բաժանում էին մոտիկ բարեկամներին, հարազատներին, հարևաններին»:²⁴ Ուխտից վերադարձողներին հարևանները դիմավորում էին. «Մուրազդ ի կատար» և «Ուխտդ ընդունելի եղնի» խոսքերով:²⁵

Ուխտագնացությունը, այսպիսով, հայ ժողովրդի և մասնավորապես գյումրեցիների տոնածիսական կյանքի կարևոր բաղկացուցիչներից մեկն է, որը, պահպանվելով մույնիսկ խորհրդային աստվածամերժ գաղափարախոսության պայմաններում, շարունակվում է առայսօր: Եթե մինչխորհրդային տարիներին ուխտագնացության բոլոր ձևերը լայնորեն էին կիրառվում, խորհրդային տարիներին, պակասելով հանդերձ, շարունակվում էին կենցաղավարել: Հատկապես Երկրորդ համաշխարհային պատերազմի տարիներին դրանք որոշակի աշխուժացում ապրեցին, ինչը պայմանավորված էր ռազմաճակատում գտնվող հարազատներին աջակցելու, վտանգներից զերծ պահելու ավանդական ձևերի՝ ուխտերի, մատաղների, աղոթք-օրհնանքի և այլ եղանակների վերահաստատումով:²⁶ Ըստ էքոնոմիկոլոգիական հետազոտությունների՝ 1970-1980-ական թթ. ՀԽՍՀ քաղաքային բնակչության 20%-ի համար ուխտ գնալն ու մատաղ անելը եկեղեցի հաճախելու հիմնական շարժառիթն էր:²⁷ Հետաքրքրական են մույն հետազոտության արդյունքում հետխորհրդային 1992-93 թթ. վերաբերող տվյալները, որոնց համաձայն՝ եկեղեցի այցելելու շարժառիթների մեջ ուխտագնացությունը հանրապետության բոլոր քաղաքներում ամենացածր տեղումն ունի:²⁸ Կարծում ենք՝ այս փաստը լրացուցիչ ուսումնասիրության ու վերլուծության կարիք ունի:

ПРОЯВЛЕНИЯ НАРОДНОГО ХРИСТИАНСТВА В ПРАЗДНИЧНО-ОБРЯДОВОМ ПОВЕДЕНИИ ГЮМРИЙЦЕВ

Резюме

К.Базеян, Г.Аганян

В статье впервые делается попытка изучить явление паломничества как важной составляющей празднично-обрядового поведения гюмрийцев и широко распространенного в Шираке с незапамятных времен. Способы, формы и виды паломничества классифицируются в диахроническом и синхроническом разрезе. В статье обсуждаются причины, даты, участники паломничества, церемония жертвоприношения и другие сопутствующие им явления. В рамках темы представлены также святыни и священные места общегюмрийского и местного значения.

²³ Գյումրեցիներն, նշվ. աշխ., էջ 161-162:

²⁴ Նույն տեղում, էջ 151-153:

²⁵ Բազեյան Կ., ԴԱՄ, 2012, Գյումրի-Շիրակ, հարցաթերթիկների նյութեր:

²⁶ Մկրտչյան Ս., Տոներ, Եր., 2010, էջ 133:

²⁷ Մկրտչյան Ս., Տոները հայոց արդի կենցաղում (էքոնոմիկոլոգիական ուսումնասիրություն), Հայ ազգագրություն և բանահյուսություն, պրակ 22, էջ 180, աղյուսակ 27, 28:

²⁸ Նույն տեղում, աղյուսակ 29: